



2. februar 2022

Inatsisartut ingerlatsinerlut maleruagassaasa § 37 imm. 1 tunngavigalugu Naalakkersuisunut ukuninga apeqquaqateqarpunga:

**Naalakkersuisunut apeqquaqaatit:**

- 1. Naalakkersuisut suliniuteqarniarnerlutik "Inuusuttut Kalaallit Nunaanni sulinerat pillugu nalunaarusiaq" allanngortissallugu, periarfissaalersillugu inuusuttut 16 aammalu 18-nik ukiullit aalisakkerivinni sulisinnaalersillugit?**
  - a. Naalakkersuisut qanoq nalilersinnaavaat nalunaarusiaq eqqaaneqartoq taamatut iliornikkut periarfissanngorsinnaanersoq?**
- 2. Naalakkersuisut ataani tunngavilersuutigineqartut eqqarsaatigalugit allanngineq qanoq isumaqarfigaat?**
- 3. Taamatut allanngineq pisortanut aningaasatigut allaffissornikkullu kingunissaat suuppat?**
- 4. Naalakkersuisut pineqartumut allanik paasissutissiisinnaanerlutik?**  
(Inatsisartunut ilaasortaqa Jens-Frederik Nielsen)

#### **Tunngavilersuut**

Soorunalimi pingaaruteqarpoq sulinermi avatangiisit tamanut pitsaasut qularnaassallugit, pingaartumik meeqqat inuusuttullu suliat ulorianaatilinnut illersornissaat.

Tamanna Sullivinni avatangiisit pillugit inatsimmi aammalu Inuusuttut Kalaallit Nunaanni sulinerat pillugu nalunaarusiami 2005-meersumi qulakkeerneqarpoq. 2005-miilli pisoqarnikooqimmat isumaqarpunga ataasiakkaanik allanngortissinnaasatsinnik eqqarsaatersuuteqarsinnaasugut.

Maleruagassat maannakkut atuuttut ima isikkoqarput, nalunaarusiami nalilerneqarsimasoq malillugu, inuusuttut 16-niit 18-nut ukiullit aalisakkerivinni sulilersissallugit ulorianarpallaartoq. Uanga pitsaasortaqaarsoraara inuusuttut 16-nik ukioqalereersimasut aalisakkerivinni sulisalissagaluarpata.

Siullertut inuusuttut arlaqalaavissorput meeqqat atuarfiat naammassisimagaangamikku ilinnialeqqinnissaminnik ingerlariaqqinngitsoortartut. Taakku isumaqarpunga aalisakkerivinni sulisalernissaat pissusissamisuuginnartoq, namminneq napatilerlutik ullaakkullu suliasaminnik makissutissaqalerlutik. Isumaqarpunga ilinnialeqqinnissaminnut kajumissaatigisassagaat.

Aappaattut takusinnaavarput aalisakkeriviit sumiiffinni arlaqartuni sulisussanik amigaaqartut. Taamaasilluni win-win situationiussaaq (iluanaarutaaginnassaaq) inuusuttut nunatsinnut tunniussaqaarnerulissappata.

Apeqquutit ullut qulit suliffiusut iluanni akineqareersimanissaat qilanaaraara.